



Stručna služba općinskog vijeća i općinskog načelnika

Broj: 01/1-02-2007/19
Ilijaš, 30.09.2019. godine

PRIJEDLOG

Z A P I S N I K

sa 34. (tridesetčetvrt) sjednice Općinskog vijeća Ilijaš, održane dana 30.09.2019. godine, sa početkom u 10:00h.

Tridesetčetvrtom sjednicom Općinskog vijeća Ilijaš predsjedavala je predsjedavajuća Općinskog vijeća Ilijaš g-đa Alma Omerović.

Prisutni vijećnici:

RB.	IME I PREZIME
	SDA
1	ŠEHERZADA ĆOSIĆ
2	ANEL BUMBULOVIĆ
3	VEHID HALILOVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	-
8	MIRZA BEKTIĆ
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	SEAD ŠEHIĆ
	SDP
15	ALAN ŠERAK
16	-
17	MIRSAD OSMANOVIĆ
	SBB-FAHRUDIN RADONČIĆ
18	AKIF BEŠLIJA
	GS
19	EDHEM HASANOVIĆ
20	ASIM MUJIĆ
	SAMOSTALNI VIJEĆNICI
21	-
22	-
23	MUHAMED HANDŽIĆ
24	ALMIR ŠPIODIĆ
	LDS
25	MEHO DŽINDO

Odsutni vijećnici:

1. Fahir Hasanović
2. Eldar Šehić
3. Semir Dizdarević i
4. Besim Gljiva

Prisutni gosti:

1. TV Vogošća
2. Radio Ilijaš – Nermina Durić-Kahvedžić
3. Fuad Masnopita – predsjednik Savjeta MZ Lješevo
4. Meho Tabaković – predsjednik Savjeta MZ Ljubina
5. Mehmed Smajlović – predsjednik Savjeta MZ Mrakovo
6. Volonter: Nedim Balta

Ostali prisutni:

1. Akif Fazlić – općinski načelnik
2. Meliha Avdibegović – pomoćnik načelnika
3. Merima Osmanović – pomoćnik načelnika
4. Sadeta Brkić – pomoćnik načelnika
5. Nijaz Spahić – pomoćnik načelnika
6. Zdravko Barić – pomoćnik načelnika
7. Aziz Fazlić – pomoćnik načelnika
8. Sanja Zagorac-Jozić – pomoćnik načelnika
9. Ilda Kahrman – sekretar OV-a Ilijaš
10. Meho Gljiva - Služba za društvene djelatnosti i poslove mjesnih zajednica
11. Nermina Lemezan - stručni saradnik za informacije
12. Nedžad Masnopita – šef Odsjeka za budžet i trezor
13. Midhat Čeho – koordinatora za poslove mjesnih zajednica
14. Đenan Suša – IT administrator
15. Maida Habibović – zapisničar

ALMA OMEROVIĆ – predsjedavajuća

Prije nego je otvorila sjednicu, predsjedavajuća je informisala OV-e da su vijećnici Muhamed Handžić i Almir Špiodić istupili iz Kluba vijećnika Parlamentarne grupe "BPS-Sefer Halilović" i od sada djeluju kao samostalni vijećnici.

Zatim je otvorila sjednicu i konstatovala da je prisutan 21 vijećnik, te da postoji kvorum za odlučivanje.

Zapisnik sa 33. sjednice dala je na razmatranje. Primjedbi na zapisnik nije bilo, pa je OV-e jednoglasno usvojilo zapisnik sa 33. sjednice OV-a.

Pročitala je predloženi dnevni red i dala na razmatranje.

SADETA BRKIĆ – pomoćnica načelnika

Sa dnevnog reda povlači tačku 6. Prijedlog Odluke o gubitku statusa javnog dobra u općoj upotrebi (k.č.br.1395/2 K.O. Podgora I) iz razloga što nije pribavljen ZK izvadak iz ZK Ureda Sarajevo.

Obzirom da diskutanata po dnevnom redu više nije bilo, Općinsko vijeće je jednoglasno usvojilo sljedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 33. sjednice
3. Prijedlog Plana stipendiranja izuzetno nadarenih učenika u srednjem i studenata u visokoškolskom obrazovanju u školskoj/akademske 2019/2020. godini
4. Prijedlog Plana stipendiranja učenika u srednjem i studenata u visokoškolskom obrazovanju u stanju socijalne potrebe u školskoj/akademske 2019/2020. godini
5. Prijedlog Odluke o davanju saglasnosti za zaključivanje Sporazuma o vansudskom izmirenju duga "MUHIĆTRANS" d.o.o. Sarajevo nastalog iz osnova Rješenja općine Ilijaš broj:05/1-23-1706/17 od 19.09.2017. godine i Rješenja broj:05/1-23-1706/17-1 od 19.09.2017. godine
6. Prijedlog Dopunskog rješenja o utvrđivanju javnog interesa za izvođenje radova na izmještanju dijela kablovske veze (naselje Karašnica-Alića Gaj)
7. Informacija o primopredaji dužnosti između predsjednika Savjeta Mjesnih zajednica u mandatnom periodu 2014.-2019. godina i novoizabranih predsjednika Savjeta Mjesnih zajednica za mandatni period 2019.-2023. godina

AD-1

Vijećnička pitanja i inicijative

MIRZA BEKTIĆ – vijećnik SDA

Inicijative:

1. Pokrećem inicijativu prema nadležnoj Službi, za uređenje ograde na mostu u Kadarićima na rijeci Bosni i postavljanje adekvatne barijere kako ne bi bio ugrožen život građana.

Obrazloženje: U više navrata obratila mi se grupa građana iz Kadarića, čija djeca prelaze preko navedenog mosta zahtijevajući postavljanje zaštitne ograde na mostu s obzirom da postojeća ograda ne zadovoljava minimume sigurnosti. U prethodnom periodu podnosio sam inicijativu sa istom tematikom, ali do dan danas nisam dobio nikakav odgovor od nadležne službe šta se planira uraditi i da li je neko izlazio na teren da utvrdi činjenično stanje na navedenom mostu.

2. Pokrećem inicijativu prema nadležnoj Službi, za uređenje prilaznog puta i dvorišta OŠ "Podlugovi" područna škola u Ljubnićima i ograđivanje istog. Nakon više kontakata sa roditeljima djece koja pohađaju ovu područnu školu, mnogi od njih su se žalili na neuslovnost i nemogućnost održavanja časova tjelesnog odgoja zbog nedostatka fiskulturne sale. Časovi tjelesnog odgoja se održavaju samo kad je lijepo vrijeme i održavaju se u dvorištu ispred škole, a dvorište je u katastrofalnom stanju. Trebalo bi isto asfaltirati kao i zagradi. Drugi problem sa kojim se učenici, roditelji i nastavno osoblje susreću je neadekvatan prilaz školi.

Obrazloženje: Prilikom izvođenja nastave tjelesnog odgoja često dolazi do povređivanja učenika u dvorištu ispred škole zbog loših uslova i dotrajale podloge. Nakon sanacionih

radova potoka koji protiče uz školu građevinska firma je neadekvatno riješila prilaz. Cijev koja služi za odvod vode ostala je veoma visoka i danas je barijera adekvatnom prilazu.

MUHAMED HANDŽIĆ – samostalni vijećnik

Inicijativa:

Pokrećem inicijativu da se za narednu godinu u Budžetu općine Ilijaš planiraju sredstva za subvencioniranje namjenskih kredita za mlade u svrhu rješavanja njihovog stambenog pitanja.

Obrazloženje: Naime, svjedoci smo stanja u kojem se nalazi cijela društvena zajednica, a posebno mlađe osobe koje svoju budućnost ne vide u ovoj zemlji. S tim u vezi, većina općina u Kantonu Sarajevo pokrenula je projekat pomoći toj kategoriji ljudi na način da im se za kredite kod komercijalnih banaka otplaćuje kamatna stopa iz općinskih Budžeta, kako bi oni riješili svoje stambeno pitanje u ovoj zemlji.

Pitanja:

1. Zašto na regionalnom putu Ilijaš-Bioča-Ahatovići (R-951) nije postavljena nikakva saobraćajna signalizacija koja bi učesnicima u saobraćaju olakšala kretanje istom dionicom?

Obrazloženje: Vozači koji se kreću iz pravca Ilijaša prema Sarajevu često lutaju po Bioči neznajući koji ih put vodi za Sarajevo, te se tako vraćaju na polaznu tačku ili pitaju građane kako da dođu do odredišta. Ovim načinom, mi kao lokalna zajednica, pokazujemo svu svoju ozbiljnost prema onima koji se prvi put ovdje nađu.

2. Kada će se riješiti problem odlaganja smeća na Banovcu, tačnije u ul.126.Ilijaške brigade ispred broja 100. i 102.?

Obrazloženje: Na navedenoj lokaciji instalirano je pet kontejnera od kojih su tri za kategorisani otpad, dok su preostala dva planirana za nekategorisani otpad. Obzirom da se uz tu ulicu nalazi veliki broj zanatskih i ugostiteljskih objekata, te da se sa drugih lokacija svakodnevno dovozi smeće i odlaže u ta dva kontejnera, postoji opravdana potreba za većim brojem kontejnera ili otvaranje nove lokacije za odlaganje smeća u neposrednoj blizini već postojeće.

MIRSAD OSMANOVIĆ – vijećnik SDP-a

Inicijativa:

Pokrećem inicijativu da izvođači radova koji su ranije, prilikom izvođenja radova na području općine Ilijaš napravili štetu privatnom ili javnom dobru, a istu nisu sanirali, ne mogu dobiti poslove dok to ne učine – saniraju napravljenu štetu.

Ako se ništa ne uradi po pitanju ove inicijative, sljedeću put ću predložiti da je usvojimo u formi zaključka.

Pitanje:

Kada će se namiriti šteta građaninu Spahić Idrizu (MZ Dragoradi) koja je nanesena prilikom izvođenja radova na putu za selo Vladajevići od strane firme "Halilović"?

Na dosadašnje zahtjeve Spahić Idriza, općinski organ se oglašio. Kako ne bi došli u situaciju da naš građanin pokrene sudski spor, tražim da se što hitnije reaguje na navedeni zahtjev. Uz pitanje prilažem:

- ranije zahtjeve
- kopiju katastarskog plana i
- fotokopiju lične karte.

ALMIR ŠPIODIĆ – samostalni vijećnik

Inicijativa:

Pokrećem inicijativu prema općini Ilijaš i nadležnoj općinskoj Službi koja uređuje i održava web stranicu općine Ilijaš, da istu unaprijedi u smislu da je prilagodi Android sistemu kako bi pregled stranice sa mobilnih aparata bio lakši za građane. Također je neophodno da web stranica općine Ilijaš ima i poveznicu za društvene mreže. Većina građana, najviše informacija dobija putem telefona i društvenih mreža, potrebno je pod hitno unaprijediti funkcionalnost web stranice koja je očigledno zastarjela, kako b se omogućio transparentan rad općine i Općinskog vijeća.

Moram da kažem, primjećujem nekih noviteta na stranici i to je za pohvaliti. Ono što vidim da nedostaje, pored ovih tehničkih stvari koje sam naveo, na stranici se ne ažuriraju redovno Odluke koje donosi Općinsko vijeće. Kad otvorite web stranicu općine u ponuđenom meniju (OPĆINSKO VIJEĆE) sa lijeve strane ima rubrika ODLUKE OPĆINSKOG VIJEĆA i kad kliknete na taj naslov otvore se sve Odluke koje su ažurirane u proteklom periodu. Zadnja Odluka na web stranici je objavljena 28.12.2017. godine koja se odnosi na davanje naziva naseljima, ulicama, trgovima i poslovnim zonama.

Koliko se ja sjećam, Općinsko vijeće je donijelo niz Odluka u protekle dvije godine.

Postavlja se pitanje:

1. Zašto nema Odluka Općinskog vijeća na web stranici općine Ilijaš?
Da li je problem tehničkog karaktera funkcionisanja web stranice ili neko ne želi da javnost i građani vide te Odluke?
2. Zašto je web stranica općine Ilijaš na Hrvatskom jeziku?

Pitanje:

U kojoj je fazi realizacija Odluke o davanju naziva naseljima, industrijskim zonama, trgovima i ulicama?

Volio bih da dobijem konkretne odgovore na ova pitanja, a ne izgovore kako to često dobivam. Priču o web stranici slušam možda od 2015. godine kako se radi neka nova web stranica. Molim konkretne odgovore kada će se unaprijediti funkcionalnost web stranice općine Ilijaš.

Neću se osvrutati na odgovore koje sam dobio na pitanja sa prošle sjednice, a možda na nekoj od narednih sjednica ću analizirati ove odgovore što sam dobio i pročitati.

ANEL BUMBULOVIĆ – vijećnik SDA

Inicijative:

1. Pokrećem inicijativu prema Zavodu za javno zdravstvo Kantona Sarajevo da se na području općine Ilijaš omogući uzimanje i slanje mikrobiološkog humanog materijala pod nadzorom stručne osobe iz Higijensko-epidemiološkog tima sa područja općine Ilijaš (Uposlenika Zavoda za javno zdravstvo).

Obrazloženje: Poznato je da stanovništvo općine Ilijaš mikrobiološke analize obavlja u prostorijama Zavoda za javno zdravstvo na lokalitetu Ilidža i Stari Grad, na lokalitetima koji se nalaze 25-30 km udaljene od općine Ilijaš. Ova udaljenost iziskuje dodatne materijalne troškove za naše stanovništvo, te nerijetko dolazi do kontaminacije istih materijala prilikom transporta. Mnogobrojni građani nisu u mogućnosti da putuju do tih lokaliteta (stariji i bolesni). S obzirom na gore navedeno, bilo bi potrebno na lokalitetu u Ilijašu organizovati uzimanje humanog materijala za mikrobiološke pretrage, te transport istog vozilom i pod stručnim nadzorom osoblja Zavoda za javno zdravstvo, bar tri puta u sedmnici.

2. Pokrećem inicijativu prema Upravi Zavoda za zaštitu žena i materinstva Kantona Sarajevo da se na lokalitetu ove ustanove u Ilijašu organizuje redovna dijagnostička pretraga UZV dojki za žene.

S obzirom na broj stanovništva, smatram da postoji osnov za pokretanje ovakve dijagnostičke pretrage na ovom lokalitetu u obimu koji je predviđen standarima i normativima.

Obrazloženje: Općina Ilijaš je u prethodnom periodu obezbjedila sredstva i obavila nabavku modernog UZV aparata za potrebe dispanzera za zaštitu žena i materinstva. Nabavljeni aparat, pored sonde za ginekološki pregled, posjeduje i sondu za UZV pregled dojki. Podsjećam vas da nabavka te sonda iziskuje dodatna finansijska sredstva koja je općina Ilijaš već obezbjedila.

S obzirom na gore navedeno i s obzirom da u Ustanovi već postoji aparat za takvu vrstu dijagnostike, potrebno je da se bar jednom sedmično, ukoliko je to moguće, na toj lokaciji omogućiti dolazak ljekara koji je stručno osposobljen za izvođenje takve vrste dijagnostike i na taj način motiviše ciljane populaciju na preventivne preglede radi ranog otkrivanja karcinoma dojke, kako bi se dobili što bolji rezultati liječenja i ishoda navedenog oboljenja.

ŠEHERZADA ĆOSIĆ – vijećnica SDA

Inicijativa:

Pokrećem inicijativu prema Službi za saobraćaj, stambeno-komunalne poslove i građnje i Službi za društvene djelatnosti i poslove mjesnih zajednica za popravak i nasipanje lokalnog puta.

Obrazloženje: U naselju Salkanov Han, odvajanje prema Halugama na dijelu trase lokalnog puta prema građanima Bešić Šerifu i Mahmutović Amelu došlo je do oštećenja na lokalnom putu usljed oborinskih voda i bujica tako da je usporeno funkcionisanje kretanja građana i saobraćaja u pokretu. Pojedine parcele uz ovaj lokalni put otkupljene su od strane nepoznatog vlasnika i isti angažuje mehanizaciju za uređenje navedenog zemljišta, te direktno i indirektno utiče na trenutno stanje navedenog puta.

U naselju Mrakovo, na trasi lokalnog puta od prodavnice "Amko" prema Gornjem Mrakovu, tj. romskim kućama i prema cvjećari "Nesimović" došlo je do pucanja i izbočina na lokalnom putu usljed nekontrolisanog prevoza teškog tereta, a isti nije obilježen adekvatnom signalizacijom, te je otežano kretanje građana i saobraćaja u pokretu. Napominjem da su navedeni putevi nedavno asfaltirani.

U naselju Gornje Mrakovo na dijelu trase lokalnog puta prema Čaturama i dalje prema Huskićima došlo je do izbočina na lokalnom putu usljed nekontrolisanog prevoza tereta na

istom i normalno funkcionisanje kretanja građana i saobraćaja u pokretu je skoro nemoguće.

Molim vas da odmah intervenišete putem inspektora, izvođača radova i nadzora i da se oštećenja što prije otklone, jer postoji opasnost za kretanje građana i mogućnost većih oštećenja na motornim vozilima i samoj trasi puta.

3. Pokrećem inicijativu prema Službi za saobraćaj, stambeno-komunalne poslove i građenje za saniranje kanalizacije Apartmansko naselje Popovići.

Obrazloženje: Od strane građana MZ Mrakovo obavještena sam da u dijelu potoka Kraljevac u Halugama izlaze otpadne vode Apartmanskog naselja Popovići. Postoji informacija da otpadne vode iz navedenog naselja nisu uopšte spojene u izgrađeni kolektor fekalne kanalizacije koji je izgrađen zajedničkim ulaganjem vlasnika naselja i Općine Ilijaš.

Molim vas da provjerite istinitost navoda iz akta i poduzmete Zakonom propisane mjere.

ADEM ALIĆ – vijećnik SDA

Pitanje:

Kada će biti pušten signal za optički kabel BH Telecoma za mjesne zajednice na području općine Ilijaš na kojima su vršeni navedeni radovi.

Obrazloženje: Na upit građana MZ Mrakovo i Podlugovi o informaciji kada će dobiti navedeni signal u poboljšanju optičkog kabla i usluga na području općine Ilijaš.

AD-2

Izveštaj o realizaciji zaključaka sa 33. sjednice

Diskutanata po ovoj tački dnevnog reda nije bilo, pa je OV-e jednoglasno usvojilo

Izveštaj o realizaciji zaključaka sa 33. sjednice

AD-3

Prijedlog Plana stipendiranja izuzetno nadarenih učenika u srednjem i studenata u visokoškolskom obrazovanju u školskoj/akademskoj 2019/2020. godini

Diskutanata po ovoj tački dnevnog reda nije bilo, pa je OV-e jednoglasno donijelo

Plan stipendiranja izuzetno nadarenih učenika u srednjem i studenata u visokoškolskom obrazovanju u školskoj/akademskoj 2019/2020. godini

AD-4

Prijedlog Plana stipendiranja učenika u srednjem i studenata u visokoškolskom obrazovanju u stanju socijalne potrebe u školskoj/akademskoj 2019/2020. godini

Diskutanata po ovoj tački dnevnog reda nije bilo, pa je OV-e jednoglasno usvojilo

Plan stipendiranja učenika u srednjem i studenata u visokoškolskom obrazovanju u stanju socijalne potrebe u školskoj/akademskoj 2019/2020. godini

AD-5

Prijedlog Odluke o davanju saglasnosti za zaključivanje Sporazuma o vansudskom izmirenju duga "MUHIĆTRANS" d.o.o. Sarajevo nastalog iz osnova Rješenja općine Ilijaš broj:05/1-23-1706/17 od 19.09.2017. godine i Rješenja broj:05/1-23-1706/17-1 od 19.09.2017. godine

AKIF FAZLIĆ – općinski načelnik

Vidjeli ste iz osnovnog Ugovora kojim su bili definirani uslovi prodaje i svih drugih radnji iz obligacionog odnosa Općine Ilijaš i "Muhićtrans", da su definirane međusobne obaveze i odgovornosti u realizaciji ovog Ugovora. Ono što je cilj i ideja jeste da se kroz ovaj dodatni Sporazum detaljnije definiše pitanje plaćanja naknada. Zbog toga je danas na Vijeću ovaj prijedlog Odluke kojim se daje saglasnost za zaključivanje Sporazuma o vansudskom izmirenju duga. Dakle, osnovnim Ugovorom je bilo definirano pravo kupcu na faznu izgradnju i praktično, fazno dobivanje građevinskih dozvola za tri objekta, jer je ta lokacija tako i definirana, a plaćanje renti, uređenja i svih ostalih naknada praktično se moglo istumačiti, mada možda postoje neke mogućnosti drugog tumačenja, ali u osnovi mi smo to na jedan način protumačili da se kroz jedan iznos unaprijed plati građevinske dozvole za sva tri objekta. Naravno da je to ogromno opterećenje unaprijed platiti za tri objekta, a onda ići jednu po jednu fazno graditi i dobivati dozvole. Služba je postupila po ovom osnovnom Ugovoru, izdala Rješenja o naplati naknada i one su za te tri dozvole cca 300.000,00 KM. Invektor je pokrenuo pitanje dobivanja prve građevinske dozvole i mi smo po pokretanju te procedure sagledali sva moguća stanja i predlažemo da se uskladi njegovo pravo koje je dobio na osnovu prava na faznu izgradnju da i fazno plaća shodno dodjeljivanju građevinskih dozvola. Dakle, prva građevinska dozvola za prvi objekat prve uplate, druga građevinska dozvola za drugi objekat da idu uplate i da time rasteretimo investitora da zaista skroz unaprijed plati nešto što će koristiti tek možda za godinu ili dvije. Dakle, suština ovog Sporazuma jeste i jedna vrsta fer pristupa dobivanju nečega što se veže za momente kada on te usluge i počinje koristiti.

Zakon je propisao da se u roku od 15 dana plaćaju rente, uređenje i sve ostalo što je vezano za građevinske dozvole, a opet kroz mogućnosti produživanja urbanističkih saglasnosti investitor će doći u poziciju da tek to pravo, odnosno dozvolu dobije nakon godinu dana od uplate. Mi ćemo naravno pokrenuti i izmjene ili izradu nove Odluke o građevinskom zemljištu i tako dovesti investitore u jednu puno realniju poziciju. Dakle, kad plaća da to bude istovremeno sa dobijanjem te vrste usluge, jer je zaista cilj da stvorimo ambijent i omogućimo investitorima da puno efikasnije mogu koristiti sredstva. Dugo smo radili zajedno sa Pravobranilaštvom KS vezano za ovaj prijedlog Sporazuma, našli smo neku vrstu zajedničkog opredjeljenja i kazali smo to u ovom Sporazumu i ja očekujem da će OV-e podržati ovaj sporazum kako bi zaista došli u fazu da na određen način i pomognemo dalje investiranje onih koji žele da investiraju i imaju lokacije na području naše općine.

MIRSAD OSMANOVIĆ – vijećnik SDP-a

Slažem se sa načelnikom da treba ići u susret ljudima koji ulažu u općinu Ilijaš. Međutim, moje pitanje glasi da li su i ostali investitori u istoj situaciji kao i ovaj investitor?

AKIF FAZLIĆ – općinski načelnik

Svi investitori su istoj poziciji, a naravno neke rješavamo na neke druge načine tj. shodno

pojedinačnim slučajevima. Znači, imamo investitore koji su bili i proveli, shodno Zakonu, plaćanje renti na odgođeno plaćanje. Dakle, kroz Zakon je dozvoljeno da se u roku od tri godine plati renta, naravno uz obezbjeđenje mjera te naplate. Vi znate da smo imali prije dvije godine i poziciju oslobađanja odnosno plaćanja rente investitora na bazi programa koji je te godine u Ministarstvu privrede bilo da su obezbjeđena ta sredstva upravo za subvenciju renti. Ovo Vijeće je praktično provelo sve javne pozive i čitav proces gdje su oni ispunili uslove i dobili tu vrstu subvencije, pomoći. Nažalost taj projekat je bio samo jednu godinu i na neki način ti investitori koji su u toj godini prošli to, su prošli najbolje. Hoće li biti novih vrsta tih projekata, ne znamo, ali mi kao općina i kao OV-e, svaki konkretni slučaj gledamo pojedinačno, gledamo ono što možemo da svakome na zakonit način obezbjediti neku vrstu povoljnosti, subvencije ili bilo čega drugoga kako bi učinili da poslovni ambijent bude povoljan. Nažalost, mi moramo i konstatirati da cijene, prije svega i lokacija zemljišta, cijene renti i uređenja su zaista visoke i visočije su sigurno u odnosu na mnoge općine. Na neki način, invstiranjem i opremanjem industrijskih zona činimo da su te lokacije atraktivnije, da one imaju manje ulaganja u infrastrukturu. Kada su u pitanju pojedinačne lokacije to je splet niza aktivnosti onih stalnih i ja cijenim, a to se vidi i na terenu da je ipak taj poslovni ambijent obezbjedio da imamo stalnu gradnju hala i da imamo stalno pojavljivanje investitora. Evo u toku je Javni poziv za jednu lokaciju i mislim da će biti onih koji će se prijaviti. Sve dok imamo onih koji će se prijaviti, očito je da ovaj naš koncept pozitivan i da trebamo stalno raditi, unapaređivati ga i činiti što povoljnijim za investiranje.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o davanju saglasnosti za zaključivanje Sporazuma o vansudskom izmirenju duga "MUHIĆTRANS" d.o.o. Sarajevo nastalog iz osnova Rješenja općine Ilijaš broj:05/1-23-1706/17 od 19.09.2017. godine i Rješenja broj:05/1-23-1706/17-1 od 19.09.2017. godine

AD-6

Prijedlog Dopunskog rješenja o utvrđivanju javnog interesa za izvođenje radova na izmještanju dijela kablovske veze (naselje Karašnica-Alića Gaj)

Diskutanata po ovoj tački dnevnog reda nije bilo, pa je OV-e jednoglasno donijelo

Dopunsko rješenja o utvrđivanju javnog interesa za izvođenje radova na izmještanju dijela kablovske veze (naselje Karašnica-Alića Gaj)

AD-7

Informacija o primopredaji dužnosti između predsjednika Savjeta Mjesnih zajednica u mandatnom periodu 2014.-2019. godina i novoizabranih predsjednika Savjeta Mjesnih zajednica za mandatni period 2019.-2023. godina

SANJA ZAGORAC-JOZIĆ – pomoćnica načelnika

Izvinjavam se što ste ovu Inforamciju dobili u ovakvoj formi. Naime, na inicijativu vijećnika Anela Bumbulovića koja nije pretočena u Zaključak, Služba je navedenu Inicijativu upravo tako i razmatrala i dala odgovor na vijećničku inicijativu koji je Kolegij OV-a pretočio u Informaciju. Ne kažem da možda bi nešto više informacija dobili, ali bi sadržajno bila obrađena onako kako priliči Informaciji.

Želim vas informisati da je nadležnost mjesnih zajednica, mjesne samouprave priključena Službi za društvene djelatnosti i poslove mjesnih zajednica prije godinu dana tako da ne želim da amnestiram Službu od bilo kakve odgovornosti, ali želim da i to uvažite. Znači, Služba koja ima tri stalno zaposlena i milion nadležnosti (zdravstvo, obrazovanje, kultura, sport, mladi, pa evo sad i mjesne zajednice). Hoću da kažem da smo učinili maksimum napora za ove Izbore, od Odluke o produžetku mandata prethodnih Savjeta, Odluke o provođenju izbora u mjesnim zajednicama, izbori, imenovanje, dodjela certifikata u saradnji sa Općinskom izbornom komisijom, primopredaja dužnosti, koja je, mislim, prvi put izvršena od rata na ovamo, da je zapisnički konstatovana, da je formirana Komisija, da je dostavljen Izvještaj općinskom načelniku o radu te Komisije. I pored toga, ne smijeta zaboraviti da je mjesna zajednica pravni subjekt sa svojim žiro-računom, sa svojim ID brojem i da je uloga općinskog organa tu da pruži stručnu i svu tehničku pomoć u radu Savjeta, tako da apsolutno smatram da su tim mjesnim zajednicama doznavačavana sredstva direktno iz Budžeta općine Ilijaš da bi ja ovdje bila moralno i krivično odgovorna za zloupotrebu tih sredstava. Nažalost to nije bio slučaj. Mjesne zajednice stižu prihod i od vlastitih djelatnosti, a vidjeli ste pojedine i od upravljanja mjesnim vodovodima. Kod otvaranja diskusije da uvažite sve ovo što je navedeno i vjerovatno će biti pitanja zašto se općinska Služba nije očitovala o Zaključku Kolegija Općinskog vijeća. Ovo je Jedinstveni općinski organ uprave, općinski načelnik je na navedeni Zaključak odgovorio u roku od tri dana i mislim da bi očitovanje Službe tu bilo sasvim suvišno. Sa nama su ovdje članovi i predsjednik Komisije koju je svojim Rješenjem imenovao općinski načelnik, a zadatak Komisije je bio upoznavanje novoizabranog rukovodstva Mjesne zajednice sa dosadašnjim radom, aktivnostima i projektima koje je započelo rukovodstvo Mjesne zajednice u prethodnom mandatnom periodu, utvrđivanje imovine i statusa imovine sa pravom raspolaganja Mjesnih zajednica, primopredaja dokumentacije i pečata Mjesnih zajednica novoizabranom predsjedniku Savjeta mjesne zajednice, upoznavanje novoizabranog Savjeta sa stanjem finansijskih sredstava i izvorom sredstava, priznanice, nota blokovi koje izdaje Mjesna zajednica, stanje blagajne na dan primopredaje, stanje neutrošenih vlastitih prihoda po analitičkoj kartici u Mjesnoj zajednici i na kraju fizički popis stalnih sredstava, sitni inventar, lista zaduženja opreme i sredstava. Ova primopredaje je zaista dala fantastičnu informaciju, odnosno presjek jednog stanja u mjesnim zajednicama, a prije svega po pitanju uslova rada mjesnih zajednica i mi smo u posljednja dva mjeseca zaista se trudili da maksimalno unaprijedimo uslove rada. Vidite da su za neke urede nabavljeni novi namještaj, nova informatička oprema i mi sa takvim trendom želimo nastaviti i zaista vas molim kod nastavka diskusije da budete odgovorni i mislim da je puno bitnije dati podršku radu ovih novih Savjeta i da imamo jedan pozitivan trend, zamah i želju mladih i podmlađenih Savjeta mjesnih zajednica da rade i da mjesnu samoupravu unaprijede, a prilikom same primopredaje originalni zapisnici su iskopirani i dostavljeni i sada možete postavljati pojedinačna pitanja i meni, ali svakako i članovima Komisije koji su direktno prisustvovali primopredaji dužnosti.

AKIF FAZLIĆ – općinski načelnik

Sanja je to praktično sve kazala, ali želim još jedanput da potcrtam da su mjesne zajednice pravna lica, imaju svoj račun, mi im plaćamo izradu završnih računa, predsjednici Savjeta potpisuju završne račune. Dakle, hoću da kažem o jednoj poziciji i ulozi mjesnih zajednica i odgovornosti Savjeta koji vode mjesne zajednice. Ovdje, prije svega želim da razlučimo odgovornosti između organa uprave i mjesnih zajednica. Ovo što se pojavila Komisija koja je bila na dispoziciji i jednom i drugom Savjetu u smislu primopredaje, dakle jeste naša stručna pomoć, tehnička pomoć, a odgovornost za rad i

upravljanje mjesnim zajednicama snose Savjeti, prethodni Savjeti, a sada novi Savjeti. Ovo što je Sanja rekla, bile je jako dobra stvar, identificirala je stanje u mjesnim zajednicama i mislim da sa ovom vrstom primopredaje da okrećemo drugu stranicu u radu Savjeta mjesnih zajednica. To je već dalo itekakve efekte. Evo od potpisivanja ovog Protokola između općine Ilijaš i Savjeta mjesnih zajednica, pa do ove tehničke pomoći, opremanja i onoga što ćemo mi zaista stalno raditi, ali opet potcrtavam, mi stalno raditi sa Savjetima mjesnih zajednica u stručnoj i svakoj drugoj vrsti pomoći i finansijskoj i dr., ali znači, odgovornost ostaje na Savjetu. Iz ovih Zapisnika se moglo vidjeti kakvo je stanje u pojedinim Savjetima. Komisije je tehnički to izvršila, a opet jedan novi Savjet, jedan stari Savjet, odnosno novi Savjet će odlučivati o nečemu što će oni će u konačnici donijeti Odluku tamo gdje postoji opravdana potreba da ispita potpuno stanje, da se pokrenu određene vrste odgovornosti. Dakle, pokretat će se i to je opet Odluka tih Savjeta. Ovdje hoću da kažem da upotpunosti podržavamo novoizabrane Savjete, da će organ uprave, ja kao načelnik, a vi ćete, kao Vijeće, kazati svoj stav. Dakle, pružit ćemo sve vrste stručnih, tehničkih ili bilo koje druge vrste pomoći koji su potrebni Savjetima i naravno dalje dopunjavati i razvijati međusobnu aktivnost u novom nizu aktivnosti koje jesu vezane za nadležnosti Savjeta mjesnih zajednica. Jedna od prvih, ja sam to i nagovijestio, jesu i ove javne rasprave i donošenje novog Zakona o lokalnoj samoupravi Kantona Sarajevo i to je takođe jedna velika prilika da se kroz Zakon potpuno definiše i mjesna samouprava, jer ona je nekako lebdila u zakonskim rješenjima. U tom kontekstu ja očekujem i da vodimo ovu raspravu. Dakle, ne o radu Službe, a Sanja je to u kontekstu nešto kazala, nego da vodimo raspravu o onome što je pokazao Zapisnik o primopredajama između novoizabranih i starih Savjeta.

ANEL BUMBULOVIĆ – vijećnik SDA

Obzirom da sam ja pokrenuo ovu inicijativu, smatram da treba da i nešto prodiskutujem. Prvo, imam jedno pitanje, a obzirom da Služba i nema nadležnosti i ne kažem da treba da imaju odgovor, ali ako neko zna da mi odgovori. Mene zanima ko upravlja žiro-računima za ove mjesne zajednice i da li ima nekih ovlaštenih potpisnika mimo predsjednika Savjeta mjesne zajednice? Odmah se ograđujem, ne kažem da trebate imati odgovor odmah, obzirom da niste nadležni, a oni su pravna lica. Znači, da li ima neki ovlašten potpisnik koji upravlja tim žiro-računima?

Kao predsjednik KV SDA iznio bih sljedeći stav: "SDA daje punu podršku transparentnom radu novog Savjeta mjesne zajednice, te daje punu podršku radu novog Savjeta mjesne zajednice za utvrđivanje eventualnih propusta u radu starog Savjeta i pronalaženje eventualnih krivaca za te propuste".

Dalje, imamo prijedlog zaključaka koje smo Kolegij i vijećnici zajedno na sastanku sa načelnikom predložili.

SEAD ŠEHIĆ – vijećnik SDA

Čitajući ove materijali uočio sam neke anomalije u pojedinim mjesnim zajednicama. Ja shvatam da Komisija koja je radila primopredaju nema nadležnosti da utvrđuje šta je bilo, kako je bilo, jer je bila zadužena da popiše šta je na stanju, šta je bilo, šta nema. Međutim, svima je ovdje poznato, da pored ovoga postoji Komisija i predsjednik Komisije za poslove mjesnih zajednica i saradnju sa drugim općinama i gradovima Općinskog vijeća Ilijaš i meni nije poznato da se ikada oglasila po ovom pitanju da u nekim mjesnim zajednicama dešavaju čudne stvari, odnosno dešavaju neke stvari. Ujedno, ne mogu da

priznam da se neko amnestira, odnosno da kaže Služba koja je zadužena da nije nadležna. Ko je zadužen? Ako su došla neka sredstva u općinu, a općina preko Službe prosljedila mjesnim zajednicama, ne može se niko amnestirati od toga. Stoga, zašto ova Komsija i nadležna Služba i je li ikada tražila određene knjigovodstvene agencije finansijske transakcije koje se vrše u određenim mjesnim zajednicama. Da li je ikada imala uvid o tome? Jednostavno smatram da predsjednik Komisije i ova Komisija iz moralnih razloga treba da podnese ostavku.

ADEM ALIĆ – vijećnik SDA

Mene zanima ko provjerava i kontroliše odgovornost Savjeta, kao što je i Sead nešto u vezi toga govorio? Da li je to samo po Statutu (Općinskog vijeća) općine Ilijaš ili Služba?

ALMIR ŠPIODIĆ – samostalni vijećnik

Razmišljao sam da se ne uključujem u ovu diskusiju, Mislim od same donesene Odluke o izboru i načinu kandidovanja, pa na ovamo, ja sam možda bio i previše "glasao" i razmišljao sam "evo ovo je sada vaš problem", a kolega Bumbulović reče da SDA podržava novoizabrane Savjete. Naravno da će ih podržavati kada su kroz SDA postavljeni, odnosno izlobirani svi Savjeti mjesnih zajednica, osim Ljubine. Znamo mi da ćete vi njih podržavati i znamo mi da bi se najradije "slomilo koplje" na onim koji nisu dio te priče. Znamo mi zbog čega je danas i ovaj Izvještaj. Pročitao sam sve Izvještaje, malo je nepregledno, ali uspio sam nekako doći do pravih informacija. Oni su otprilike copy/paste, svi na isti način. Ja znam da sve što kažem, neko bi to najradije izbrisao gumicom, međutim, to se ne može tek tako desiti. Tamo gdje možete uticati, to uradite. Primjer, da ja nikako nisam bio predsjednik Savjeta mjesne zajednice Podlugovi. U Izvještaju stoji da je aktuelni predsjednik izvršio primopredaju 2014.-2019.godine i isto tako je slučaju Starom Ilijašu, gdje je kolega Armin bio predsjednik Savjeta do 2016. godine. Meni nije teško palo što mi nismo bili tako na ceremoniji dodjele satova, ni ja ni kolega iz Starog Ilijaša, ali sat se može naručiti, sada je to dostupno i jeftino, ali me nekada zaboli činjenica da neko pokušava da sve što je neko radio u tom periodu, ako nije dio ove strukture koja podržava nove Savjete, to bi sad trebalo izbrisati totalno, okrenuti drugi list, početi novu priču. To je jedno. Drugo, pitanje za Službu, po kojem Statutu rade novi članovi i predsjednici Savjeta mjesnih zajednica i imamo li Statut uopće? Godinama se vodila dilema što nema Statuta mjesnih zajednica. Odgovorite konkretno ima li Statut mjesnih zajednica, ko ima Statut, je li izmjenjen postojeći? Ja sam imao Statut u Mjesnoj zajednici Podlugovi. Mjesna zajednica Mrakovo ima Statut. Znači, po kojem Statutu se radi. Da imamo taj dokument onda ne bi postavljali pitanja ko je za šta nadležan. Kroz Statut i Poslovnik o radu Općinskog vijeća se tačno vidi za šta je ko nadležan. Dalje, vidim da su u posljednje vrijeme često sastanci sa Savjetima mjesnih zajednica i mislim da novi Savjeti rade dobro i da će nova mlada struktura napraviti promjene, uvesti neke novitete što je zaista bilo potrebno. Na tome smo i mi insistirali 2014. godine i kroz Komisiju i kroz razne sastanke, međutim nismo uspjeli doći do nekih ciljeva do kojih dolaze novi Savjeti mjesnih zajednica i ja im čestitam na tome. Nedavno sam u medijima pročitao da se potpisivao neki Protokoli i da ne bude lično, predsjedavajuća je bila potpisnik Protokola vezano za saradnju mjesne zajednice i općine. Mislim da je logika da mora postojati saradnja mjesne zajednice i općine. Volio bih da mi neko objasni o kakvom Protokolu se radi i recite mi vi, kao predsjedavajuća OV-a, šta ste vi u ime Općinskog vijeća potpisivali u tom Protokolu. Znači, nije ništa lično, nego samo radi informacije. Kada je u pitanju ova primopredaja vidjeli ste sve propuste koji postoje i vidjeli ste ko je napravio te propuste. Nije to samo

sada, a i Služba je to znala i svi vi znate šta je ko radio kroz mjesne zajednice, samo što kao što Sead reče, neki amnestiraju, a nekima bi se i kičma slomila da ikako može. Mislim da bi trebalo da imamo isti odnos prema svima. Znate vi šta je ko radio kroz mjesne zajednice i prije, nego se pravite naivni kao ne znate, ne piše nigdje. Morali pisati da bi se nešto znalo?

MIRZA BEKTIĆ – vijećnik SDA (replika)

Kolega Špiodiću, vi znate da kada se neko kandiduje da ima pravo da lobira. Kažete da je sve izlobirano. Ako se neko prijavio za neku listu ima pravo da se bori i da lobira bilo gdje i bilo kod koga. Demokratsko je pravo da se svako prijavi i da bori za sebe. Dalje, drago mi je što su načelnik i navedena Služba preuzeli aktivnosti oko uređenja mjesnih zajednica. To što je bilo prije, kaže da treba istražiti i vidjeti šta se izdešavalo i urediti kako treba. Drago mi je da će novi Savjeti mjesnih zajednica raditi kako treba, znamo da su pravna lica, da imaju svoj žiro-račun, ID broj, da podliježu godišnjoj prijavi završnog računa kao i sva udruženja i nadam se da će raditi transparentno.

ANEL BUMBULOVIĆ – vijećnik SDA (replika)

Osjećao sam se spomenuto od kolege Špiodića, pa moram i odgovoriti, ali kolega Bektić mi je već uzeo rečenicu. Znači, kolega Špiodiću, lobiranje je dozvoljeno sredstvo političke borbe, a što se tiče zapisnika za Mjesnu zajednicu Podlugovi, po mom shvatanju ove Komisije, ovo je Zapisnik kojem prisustvuje trenutni predsjednik Savjeta mjesne zajednica, a to je Safet Gabeljić. Takvu istu vrstu Zapisnika ste trebali i vi da imate kada ste napuštali funkciju predsjednika Savjeta mjesne zajednice Podlugovi i predavali tu funkciju novoizabranom predsjedniku Savjeta, odnosno Safetu Gabeljiću. To je jedna stvar. Zbog toga se možda i ne spominje vaš rad. U svoj ovoj raspravi, mi smo zaboravili spomenuti, odnosno pohvaliti rad pojedinih mjesnih zajednica. U ovim Izvještajima smo vidjeli da je utvrđena kompletna dokumentacija, transparentan rad, a to su prije svega Mjesna zajednica Mrakovo, Mjesna zajednica Podlugovi i kolega Špiodiću čestitke i za vaš rad jer je i vaš rad naveden kao transparentan rad. Uglavnom toliko, a ima još par mjesnih zajednica gdje Komisija nije imala nikakvih zamjerki na zatečeno stanje i njihov rad u prethodnom mandatu.

ALMIR ŠPIODIĆ – samostalni vijećnik (replika)

Kolega Mirza se utrkuje da replicira meni kako sam nešto pogrešno rekao. Znamo mi kolega da je lobi dozvoljen, ali nije dozvoljen pritisak, nije dozvoljeno ucjenjivati ljude da se ne smiju kandidovati, jer neće moći dobiti posao ako budu kandidati.

ALMA OMEROVIĆ – predsjedavajuća

Zamoliti ću vas sve da se prilikom rasprave držite dnevnog reda i materijala o kojem raspravljamo, a to je već neka druga tema. Znači, da se zaista vratimo na diskusiju o predmetnoj tački dnevnog reda i jedni i drugi i treći.

ALMIR ŠPIODIĆ – samostalni vijećnik

Čovjek mi je replicirao da je dozvoljen lobi i ja mu kažem da je dozvoljen lobi, ali nije dozvoljen pritisak i prijetnje da neko ne smije biti kandidat. Nemojte me tjerati da govorim

imena i prezimena u više mjesnih zajednica. Samo kažem, lobi jeste dozvoljen, ali "igra" kakva se vodila, nije. Nisam ja ništa loše mislio u kontekstu kada kažem da jeste izlobirali, jeste odradili i ja vam čestitam i čestitam novoizabranim. Ja sam se protivio Odluci gdje su narušena moja ljudska prava i da se ne vraćam na to, a o tome ćemo kada dođe odgovor Ombudsmana za ljudska prava. Tada ćemo analizirati, a sada nećemo o tome pričati. Kolega Bumbulović je vrlo korektan i uvijek ima korektne stavove i čestitao bih mu na postavljenom pitanju da malo diskutujemo oko nekih "osjetljivih" tema gdje većina "pere ruke" od toga. Znaju šta se dešava, ali pokušavaju to gurnuti da neko to drugi kaže "nemoj da ja govorim, da se zamjeram s nekim ovdje". Rekli ste za primopredaju u Podlugovima. Tačno je, bio je Zapisnik između mene i Safeta u februaru 2017. godine kada sam ja predao sve što sam radio od 2014. godine do 2017. godine uz završne račune, uz analitičku karticu sa banke, stanje računa, broj protokola, sve ono što sam ja radio i sve zahtjeve predao Safetu. Safet je trebao valjda da preda ono što je on radio od 2017. godine do 2019. godine, a ne da se vodi da je predao nešto od 2014. godine do 2019. godine. To izgleda ovako. Da sam ja uradio bilo kakvu pronevjeru, bilo šta da sam uradio, ali nisam, Safet je uzeo to da je on upravljao mjesnom zajednicom od 2014. do 2019. godine. Ne smeta to meni toliko, ali hoću da napomenem da se dešavaju ti propusti. Hvala kolegi Bumbuloviću što ovako korektno kaže i jedan je od rijetkih koji prizna da je neko nešto radio ako nije iz tabora iz kojeg dolaze sve ove informacije.

SEAD ŠEHIĆ – vijećnik SDA

Prvo, smatram da bi nekog optužio, moraš imati dokaz. U ovom materijalu koji smo dobili, imamo samo sporne dvije mjesne zajednice. Nije fer raspravljati o drugim mjesnim zajednicama, jer su tu stvari uredi. Da bi nekog optužio za bilo šta, virtuelno govorio ovako ili onako, donesi dokaz, ipak je to neko je krivično djelo. Druga stvar, ovdje imamo koordinatora za mjesne zajednice Midhata Čehu gdje se vodi kao potpisnik, ja bih zamolio da se obrati i pojasni malo stvari tj. da nam se obrati.

AKIF FAZLIĆ – općinski načelnik

Mi smo u želji, da imamo mjesne zajednice koje mogu kao pravna lica kako su definisana Statutom raditi samostalno i u nečemu drugom gdje oni nemaju kapaciteta da na tom nivou to rade. Najbolji primjer koji je sada kazao Almir Špiodić koji je rekao da je Savjet dok je on bio predsjednik i novoizabrani predsjednik između sebe napravili primopredaju i stavili na to tačku i to se tako svugdje radi. Međutim, mi smo sada procijenili i formirali smo Komisiju koja je bila tehnička pomoć, stručna pomoć primopredaji ovih Savjeta. Dakle, to govori o stanju kapacitetima mjesnih zajednica i onoga što mi želimo da one budu. Ova konstatacija da sada neko želi nekome "slomiti leđa" ne stoji i ovdje to niko ne želi. Odluka za odgovornost za prethodne Savjete je na novoizabranim Savjetima koji treba da prouče stvari, da vide da li eventualno ima odgovornosti ili nema odgovornosti. Mi trebamo kroz taj princip dalje razvijati snagu i kapacitete mjesnih zajednica. Kada je u pitanju ova Informacija koju ste tražili, očito je da je i Komisija koja je tu bila kao stručna i tehnička pomoć, napravila dvije greške. To je greška u Savjetu MZ Podlugovi i MZ Stari Ilijaš gdje su se u jednom mandatu promijenili predsjednici Savjeta. To je trebalo konstatirati i navesti u ovim Zapisnicima, a ovo je prilika da se izvinem dvojici predsjednika Savjeta MZ-a koji nisu bili na svečanom prijemu, a trebali su biti jer su obnašali tu utlogu u jednom periodu tog jednog mandata. Ja predlažem nadležnoj Službi da tu grešku, mada je teško ispraviti, bar na neki način popravimo. Pitanje potpisa – potpisnici su predsjednici Savjeta. Oni potpisuju račune, završne račune. Znači, oni su ti koji sa tog aspekta vode Savjet

mjesne zajednice. Ko kontroliše Savjet mjesne zajednice? Pa isto oni koji kontrolišu rad ovog Vijeća. Dakle, to su oni, prije svega, koji su ih izabrali, s tog aspekta. Iz drugog aspekta, kontrolišu nadzorni organi koji kontrolišu i sve druge (nas, druga pravna, privatna, javna lica, udruženja). Dakle, to je ta vrsta kontrole.

Što se tiče potpisanog Protokola, želim i ja reći svoj stav o tome. Almire, ti pogotovo znaš našu saradnju sa UNDP i ta je ideja proizašla iz UNDP-a i onda smo je mi raširili da ide na svih 14 mjesnih zajednica, a ne samo za 6. Protokol je jedna vrsta dodatne obaveze, a naša ključna obaveza je definisana našim Zakonima, našim Statutima, tako da on u osnovi malo konkretnije definira i promovira saradnju i prije svega na neki način promovira naše opredjeljenje da ta mjesna samouprava iz dana u dan dobiva mjesto koje treba da ima i koje prije svega, u smislu treba da jača. Pitanje Statuta mjesnih zajednica – neke mjesne zajednice su usvojile svoje Statute, neke nisu, a potreba da se to dalje uređuje itekako postoji. Ja sam u uvodnom nastupu kazao da je ovo sad proces koji je započet i koji bi zaista trebali kroz neki kratak period intenzivno raditi da zaista zatvorimo pitanje načina funkcionisanja kada su u pitanju akta, kada je u pitanju vođenje mjesnih zajednica s aspekta finansija i svakog drugog. Još jedanput napominjem da je općina plaćala knjigovodstvenim agencijama vođenje finansija, izradu završnih računa i to je taj koncept koji možemo i dalje koristiti i raditi, ali eto i ponuditi koncept koji govori o odgovornosti Savjeta mjesnih zajednica. Danas sam možda i previše potcrtao tu vrstu odgovornosti, ali zaista je moramo potcrtavati. Isto kada pričamo o radu Udruženja i kada se opet vrati nešto na Službu, ja to stalno kažem, imaju upravna tijela ta Udruženja, imaju upravni odbor, svoje skupštine i oni su nosioci odgovornosti za rad tih Udruženja. Tako, ako želimo mjesne zajednice u punom kapacitetu, onda one moraju preuzeti ono sve što jeste jedan teret odgovornosti za vođenje ove vrste poslova.

U najkraćem sam pokušao sublimirati ovih nekoliko pitanja koja su postavljena, a detaljnije tu je i moja pomoćnica i možemo detaljnije odgovoriti na neka pitanja.

ALMA OMEROVIĆ – predsjedavajuća

Načelnik je djelimično odgovorio na pitanje koje ste meni uputili. Naime, mi smo i ranije imali saradnju, samo je bila nekin način neformalna, ali ovim Protokolom se formalizirala i Služba je uz pomoć predstavnika UNDP-a izradila kvalitetan dokument tako da je na prijedlog načelnika odlučeno da u potpisivanju Sporazuma ne učestvuju samo partnerske mjesne zajednice, nego sve mjesne zajednice kako bi smo i mi kao Vijeće i ja kao predsjedavajuća dali punu podršku i da direktno učestvujemo u poboljšanju rada Savjeta mjesnih zajednica i učešća u projektima koji se nude, a mi smo i ranije podržavali i donosili mnogobrojne Odluke vezano za naše mjesne zajednice i projekte u mjesnim zajednicama tako da je to samo stavljeno u jednu formu koja se zove Protokol.

MUHAMED HANDŽIĆ – samostalni vijećnik

Gledajući ovaj materijal listajući ovo što je uradila Komisija, treba im odati priznaje. Ljudi su to uradili onoliko koliko su znali i mogli. Međutim, ima nedostataka, a to je po sačinjavanju ovih Zapisnika trebalo je na kraju, po meni, napisati prijedlog mjera za određene mjesne zajednice. Zašto ovo govorim? Upoređujući npr. Mjesnu zajednicu Stari Ilijaš ili Mrakovo sa Mjesnom zajednicom Luka je sasvim smiješno. Predsjednik i Savjet Mjesne zajednice Luka rade i egzistiraju u kontejneru. Znači, nisu im se obezbjedili uslovi za rad. Prilikom izradve ovih Zapisnika, trebalo je i to napomenuti da ljudi imaju neuslovne prostorije i nemaju uslova za održavanje sjednice. Kako će Elmin Brkić održati Savjet mjesne zajednice u zimskom periodu kad tamo nema ni struje, dok neki predsjednici

Savjeta, vjerovatno zbog toga što nisu bili inertni cijelo ovo vrijeme, obezbjedili sebi rezidencije možda čak bolje nego što načelnik općine ima. Da li je to preko UNDP-a ili na neki drugi način, to oni sigurno znaju. Ja ne želim ovdje njih da okrivljujem, njima svaka čast, ljudi su se borili, ali isto tako kažem da treba stvoriti uslove i drugim Savjetima mjesnih zajednica da ljudi rade. Naveo sam već prijedlog mjera i ne odnosi se to samo na ovo da se stvore uslovi za rad, nego u prijedlogu mjera treba navesti, kako vidim obilasci su vršeni u šestom i sedmom mjesecu ove godine, rokovi su dati deset dana da se inventar ili šta već, dovede u ispravno stanje, da li je to urađeno u tom roku. Trebalo je napisati da mi znamo da je npr. MZ Gajevi dat rok od deset dana da dovedu stanje u ispravno, a ona to nije uradila. Zbog čega nije uradila i pokrenuti postupak, i to se može uraditi. Nije bitno samo konstatovati stanje. Stanje je konstatovano već samo po sebi. Trebalo je poduzeti odgovarajuće mjere. O tome ćemo posebno morati razgovarati kada budemo usvajali Izvještaj općinskog organa na kraju godine, nemojte zaboraviti, da mi budemo ovdje samo kao voštana figura, jer mi vijećnici ispadamo smiješni, mi dižemo i spuštamo ruke, ne pročitamo materijal, ne znamo o čemu se radi i to tako ide godinama. Moramo mi pomoći i općinskom načelniku i službama da dođu s ovim na čisto i da izvedu na pravi kolosjek. Vjerujte, u ovim mjesnim zajednicama nije sve tako sjajno, ali na brzinu koliko su mogli ljudi su to uradili i još jednom im se zahvaljujem. Evo prvi put za deset godina koliko učestvujem u ovom društvenom radu da je neko napravio Zapisnik oko primopredaja. Navest ću jedan primjer i ja sam to radio nekada i kada je došla primopredaje to smo sastavili u dvije rečenice (Preuzimam u ispravnom stanju. Predajem u ispravnom stanju.), i ništa više. Da li sam ja predao razvaljen sto ili računar, to nije bitno. Jesam li sa dobio na raspolaganje deset stolica, a predato pet, ni to nije bitno. Znači, sve se to mora izdetaļisati. U taj proces ćemo mi morati ući i to se mora do narednog Izvještaja o radu općinskog organa pripremiti. To moramo dati do znanja i onima koji se bave ovim.

SANJA ZAGORAC-JOZIĆ – pomoćnica načelnika

Načelniku je vjerovatno promaklo, a nije odgovorio na pitanje Seada Šehića vezano za rad Komisije za poslove mjesnih zajednica i saradnju sa drugim općinama i gradovima. Služba za društvene djelatnosti po prvi put dobiva, kroz Odluku o uslovima, načinu kadidiranja i provođenja izbora i dodjeli mandata, mandat da vrši nadzor nad radom mjesnih zajednica i da su mjesne zajednice tromjesečno dužne dostavljati Izvještaj o svom radu. Do sada je taj mandat imala Komisija. Vjerovatno da je po toj konekciji da je Općinsko vijeće osnivač mjesne zajednice, formirana Komisija kao stalno radno tijelo i o tome će vam vjerovatno nešto više reći predsjednik. Želim samo reći Seade, ne amnestiram Službu ni sebe lično, ali do sada nikakva sredstva iz Budžeta općine Ilijaš nisu nikada doznačavana direktno na račun mjesnih zajednica kao što to radimo sa Udruženjima. Udruženja sve i jedan fening koji im je doznačen iz općinskog Budžeta su dužna opravdati i oni to rade. Sredstva koja dobiju sa viših novoa vlasti nisu dužna opravdati općini Ilijaš, niti mi na tome insistiramo. Ja sam, kao rukovodilac Službe, odgovorna za javni novac iz Budžeta koji se troši kroz Službu za društvene djelatnosti i transferiše različitim organizacijama. Znači, do sada to nije bio slučaj. Svugdje gdje je općina Ilijaš bila potpisnik Memoranduma, kao što je Memorandum sa UNDP-om o informatičkoj opremi, mi ćemo poduzeti aktivnosti i tražiti i nadzor i podnijeti krivičnu prijavu policijskim organima da se istraži šta je sa to opremom i dalje aktivnosti zajedno sa UNDP-om. Vjerujte da to neće ostati zataškano. Pokušali smo to na nekoj ljudskoj osnovi da to riješimo, ostavimo određeni rok da se to vrati i ukoliko to do kraja ove sedmice ne bude vraćeno, mi ćemo sigurno poduzeti značajne mjere da se to završi.

MEHMED SMAJLOVIĆ – predsjednik Komisije za poslove mjesnih zajednica i saradnju sa drugim općinama i gradovima

Prije svega, iz moje vizure i vizure općinskog organa Vijeća i radnih tijela i prakse i mene kao predsjednika Savjeta mjesne zajednice Mrakovo i Komisije i hvala Kolegiju što ste prozvali ovu Komisiju i ovo je prilika da se treba boriti i otimati da dođeš do riječi, a u Poslovnku o radu Općinskog vijeća piše da kada vijećnici iscrpe svoje diskusije se mogu obratiti i predsjednici Savjeta i građani i načelniku i Vijeću. Ja na to podsjećam, čitajte malo Poslovnike i ovo su prilike da se mi konektujemo, resetujemo i da se ne vraćamo na ono stanje koje je bilo do sada. Čestitam na ovoj Sjednici, ovoj Informaciji, ovom inputu koji je danas na dnevnom redu. Da se radilo, radilo se. Vijećnici iz prošlog mandata, Komisija u prošlom mandatu gdje sam ja bio predsjednik, izvršila je monitoring svih mjesnih zajednica, napisala sa prijedlogom mjera sve šta treba uraditi. Vratite se malo nazad i vidjet ćete, ali ne insistiram na tome. Međutim, to može biti input za prijedlog mjera koje traži vijećnik Muhamed Hadžić. Vjerujte ljudi, sve je zapisano, napisano, sve je do nas. Drago mi je da je općinski načelnik shvatio, vidio (da li je to pod pritiskom, da li je to lobiranje) koliko znače mjesne zajednice, koliko vi značite kao vijećnici, koliko mi kao građani značimo, koliko organ uprave znači. Ja dolazim na sjednice Općinskog vijeća i vidim da dolaze i novi predsjednici Savjeta mjesnih zajednica nedovoljno. Svih četrnaest trebaju da dođu ovdje. Ako ne mogu oni, neka dođu zamjenici i budu aktivni sudionici stvari koje mi ovdje radimo.

Prije svega, ovo neka bude moj prijedlog: Šta je bilo - da zaboravimo, da se izdignemo iznad svih dosadašnjih propusta. Znamo mi kakvo je stanje, da krenemo ka novim informatičkim, političkim i drugim strukturama kada je u pitanju općina Ilijaš, Općinsko vijeće i organ uprave. Činjenica je da smo mi na raskrižju, kao što kažu Hrvati. Postoje nadležnosti Općinskog vijeća i postoje nadležnosti organa uprave. Vješto to načelnik govori. Tehnička priprema i slažem se da ima pravo da formira Komisiju koja je obišla i napisala sve ovo, ali isto tako ova Komisija koja je radno tijelo ili suport ili pomoć Općinskom vijeću treba da bude rabljena/korištena, ne zbog tih 50,00 KM. Kolege iz Komisije meni spočitavaju, govore zašto ne radi Komisija, zašto ne djeluje. Radili smo i ja sam na Izvršnom odboru SDA već najavio ostavku. Ona još nije provedena pismeno. Ne slažem se ni ja sa takvim odnosom i stanjem. Ako ćemo to promijeniti gospodo iz SDA i svi ostali, znači ja ću i dalje ovu Komisiju voditi, ali shodno Poslovniku, Statutu i Zakonu i ovim regeneracijskim stvarima koje dolaze. Znači, mi svi treba da se regenerišemo, od načelnika, pomoćnika itd. Ovo što vijećnik Muhamed kaže, doći će na dnevni red Izvještaj općinskog organa za godinu dana i ja vas molim da vidimo po organima, komisijama ko šta radi, kako radi. Ovo kažem dobronamjerno, ne da bi nekoga ovdje osuđivali.

Hvala vam predsjedavajuća, načelniče i svi ostali što ste mi dali priliku da govorim. Ovdje govori pred vama najbolji predsjednik mjesne zajednice. Ja sam to rekao i pred višim organima da ova mjesna zajednica i ovaj predsjednik bude najbolji, a mi time promoviramo i općinu Ilijaš, promoviramo i vas. Ja vas molim općinski vijećnici kada diskutujete da što više budete općinski vijećnici, a ne da budete predsjednici mjesnih zajednica. Neka predsjednici mjesnih zajednica rade svoj posao, a općinski vijećnik neka radi svoj posao. Nemam ništa protiv što gospodin diskutuje o Podlugovima, ali općinski vijećnik treba da diskutuje i o Crnoj Rijeci itd. Imam pravo da ovo kažem jer sam bio i u mandatu vijećnika i evo treći mandat predsjednika mjesne zajednice, radio u organima uprave itd. Znam kako ovo funkcionise. Prema tome, ne treba nama puno. Bez obzira ko je na vlasti, imamo dobar način, dobar Budžet, dobru podlogu i sve što zamislimo, u koordinaciji sa načelnikom, Vijećem da sve ovo uradimo.

Vratit ću se malo u historiju svog koordiniranja. Od 1996. godine sam na ovoj poziciji i prošli smo kroz raznorazne faze i mislim da smo na određeni način afirmisali mjesne zajednice, od vremena kad se aklamacijom birao predsjednik Savjeta mjesne zajednice, odnosno ja sam iz perioda Breze kada su određeni povjerenici i odgovorno tvrdim da mogu da dam afirmativno mišljenje spram toga. Biću ličan, ali velike napore sam uložio sa rahmetli Rašidom Medićem da dobijemo tajne izbore i mislim da smo bili među prvima u regiji ovdje da smo došli do tog nivoa i smatram da je taj segment otprilike zadovoljen. Lično mislim, kao građanin, da ne dajem dovoljno učešća u radu svoje mjesne zajednice, odnosno smatram da su Savjeti mjesnih zajednica više bili pod ingerencijom predsjednika, da je izostalo kolektivnog rada što jeste namjena Savjeta mjesnih zajednica, a pogotovo što zbog građana nije imao dovoljno afirmacije. Ono što je rekao načelnik, i građani su u svemu tome "pasivni". Data je jedna mogućnost da se petnaest potpisnika, od trideset građana, na njihov zahtjev da se nešto rješava, da se obavezno održi zbog građana, a ukoliko to ne uradi Savjet mjesne zajednice, ne izvrši pripremu za održavanje zbora, onda inicijator to može da uradi sam. Znači, Statutom koji je Služba na vrijeme uradila i podijelila Savjetima mjesnih zajednica, njihov zadata je bio, a tada je to važno, da trideset građana usvoji taj Statut i on je bio važeći dokument za rad Savjeta mjesne zajednice. Kako ja to vidim stvari iz nekog svog iskustva? Mehmed je maloprije rekao da je najbolji predsjednik. To jeste možda malo tendenciozno, ali njegova iskustva i njegova potreba da da doprinos u radu svoje mjesne zajednice bila je evidentna i on je to i postigao. Ja sam strašno bio ljut na odnos autokrata predsjednika Savjeta koji su bili društvo jednog lica. Takvu smo imali jednu situaciju. Kao da je tu koordinator samo da se sekira, sugeriše, predlaže, a svi smo zajedno odgovorni za razvoj svoje zajednice. Mislim da ovo Vijeće treba da donese Zaključak da se spram ove teme sprovede jedna korektna i kvalitetna rasprava, da vidimo iskustva drugih općina i drugih zajednica koje imaju drugačiju organizaciju mjesnih zajednica i da je unaprijedimo. Vi ste svjesni činjenice da mi nemamo profesionalne sekretare mjesnih zajednica, odnosno da je predsjednik Savjeta u ovoj našoj konstalaciji odnosa i administrativni radnik i predsjednik. Sada smo dobili situaciju da imamo predsjednike Savjeta sa određenim iznosom gdje možemo da kažemo ti imaš naknadu za svoj rad, a imamo članove Savjeta koji imaju naknadu za svoj rad. Ja, poučen svojom iskustvom mislim da to nije dovoljno, a odnos prema zajednici treba da bude vizionarski, ljudi treba da imaju volju i želju kad se kandiduju za predsjednika Savjeta da budu vizionari. Da li je to politika uspjela ili neki drugi lobi i sad ne želim da u to ulazim, ali ja ću biti pod dozom skepse da li ovi Savjeti su na pravom putu, putu razvoja svojih zajednica. Stoga vas molim uvažena predsjedavajuća da jedan Zaključak bude potreba za održavanjem javne rasprave u cilju unapređenja ove oblasti. Kao član Komisije koja je zajedno bila sa Nedžadom Masnopitom i Mehmedom Gljivom sam normalno vidio stvari i prije nego što je Mehmed napravio prijedlog mjera, bili su pokušaji koordinatora da se stvari unaprijede. Mislim da kada smo zadnji put imali sastanak, da većina novih predsjednika Savjeta ima potrebu za jačom informatičkom opremom, za kabinetima koji su primjer kao Mehmedov. Bježi se od suštine. Suština je kroz jak aktivizam, rad Savjeta kao najodgovornijeg organa, odnosno potreba za zbor građana za sve probleme. Mislim da inače Savjeti nisu dovoljno učestvovali kroz javne rasprave, kroz neke aktivnosti koje se tiču regulacionih planova itd. i to je jako velika šteta za razvoj ove zajednice. Što se tiče same Komisije, mi smo stvari konstatovali onakve kakve jesu i mislim da smo uradili časno i čestito svoj posao. Jako mi je važno što je načelnik rekao da Savjeti kao pravna lica mogu da pokrenu odgovornost spram onih za koje treba da se pokrene, a lično mislim da smo spori u tim stvarima. Zašto? Ostavlja se jedan prostor za raznorazne manipulacije,

priče, nejasnoće itd. Molim vas da glede ove oblasti, vi kao osnivači, uđete hrabro i smjelo u ovu oblast i uz pomoć i Komisije i Službe uđemo u jednu kvalitetnu pripremu da se ova oblast definitivno popravi.

ALMA OMEROVIĆ – predsjedavajuća

Na Kolegiju smo imali jedan zajednički stav da predložimo Zaključak vezano za ovu Informaciju, a sve ovo što su kolege u diskusijama predlagali da ide u vidu Zaključka. Na neki način sve je definisano kroz ovaj Protokol i imat ćemo priliku pratiti u nastavku rad Savjeta mjesnih zajednica.

Sada ću predložiti dva Zaključka:

1. Općinsko vijeće Ilijaš daje punu podršku novoizabranim Savjetima mjesnih zajednica sa područja općine Ilijaš, da u potpunosti utvrde činjenično stanje vezano za rad prethodnih Savjeta mjesnih zajednica, te na osnovu toga, ukoliko je potrebno, pokrenu i određene radnje za utvrđivanja odgovornosti istih.
2. Općinsko vijeće Ilijaš zadužuje općinske Službe općine Ilijaš, da kontinuirano pružaju stručnu pomoć u radu Savjeta mjesnih zajednica po svim pitanjima vezanim za njihove nadležnosti.

Smatram da su kroz ove Zaključke obuhvaćene sve diskusije i prijedlozi koje smo imali.

MUHAMED HANDŽIĆ – samostalni vijećnik

Imam primjedbe na ove Zaključke. Na prvi Zaključak imam primjedbu tamo gdje ste naveli da novi Savjet mjesne zajednice utvrdi činjenično stanje i da poduzme mjere. Ja bih tu odgovornost prenio na Komisiju za poslove mjesnih zajednica i saradnju sa drugim općinama i gradovima i predsjednika Komisije. Naravno da će oni utvrditi stanje kakvo jeste i dobit ćemo opet ono što dobijamo svake godine, odnosno svake četiri godine. To je neki Izvještaj kako je ko imao vremena da nam napravi, ali kad to napravi Komisija koja ima ovlaštenja, koja je i zadužena za to, onda je to za nas vjerodostojan dokument. Dalje, bježimo od odgovornosti. Dakle, nismo napisali suštinski Zaključak, a to su Statuti Savjeta mjesnih zajednica. Treba im dati rok da se Statuti pripreme i urade. To je gospodin Čeho davno uradio, još prije deset godina i podijelio svima nama. Međutim, kada su u pitanju promjene predsjednika i Savjeta mjesnih zajednica, oni taj Statut odmah stave ništavnim i ne vrijedi prijašnji Statut predsjednika Savjeta i novog Savjeta mjesne zajednice. "Mi ćemo sada raditi po svom". To mi ne smijemo dozvoliti. Šta hoću da kažem i da predložim? Da donesemo Zaključak i damo određeni vremenski period, možda dva mjeseca, da svi predsjednici Savjeta mjesnih zajednica održe zborove građana i da usvoje Statute mjesnih zajednica. Dalje, da te Statute donesu na ovjeru predsjedavajućoj Vijeća, jer taj Statut će biti i korišten i upotrebljiv onda kada ga mi ovjerimo, a to je da Vijeće odobri taj Statut mjesne zajednice. Znači, mi da ga odobrimo i onda ga neće moći staviti van snage niti jedan naredni predsjednik Savjeta mjesne zajednice. Predlažem da to bude jedan od Zaključaka kako bi mi pomogli ovim ljudima koji već rade u Savjetima mjesnih zajednica i naravno da unaprijedimo njihov rad.

ALMIR ŠPIODIĆ – samostalni vijećnik

U suštini je rekao kolega Handžić, a ja sam samo htio da kažem da za ovaj prvi Zaključak

koji ste predložili ja ne bih želio glasati, jer mislim da mi ne možemo da dajemo ovlasti i bježimo od odgovornosti možda onih koji bi trebalo da preuzmu odgovornost na sebe. Da novi Savjeti poduzmu mjere, ja sam to tako protumačio, protiv nekih starih predsjednika. Znamo mi da tu ima rivalstva i ličnog karaktera. Ako neko treba da mjere poduzme, onda su to stručne Službe i Komisija.

ALMA OMEROVIĆ – predsjedavajuća

Kada sam čitala prvi Zaključak kazala sam da su nekako obuhvaćene sve diskusije koje smo imali, pa evo i predstavnici Službe, pečat, žiro-račun, ljudi imaju potpunu odgovornost kada su preuzimali mandate da i sprovode te neke radnje i mi ćemo im dati potpnu podršku, stručnu i Komisija će im pomoći u određenim procedurama, te u tom smislu ostajem pri prijedlogu Zaključaka, te da dodamo još i treći Zaključak:

3. Da se održe zborovi građana u mjesnim zajednicama i donesu Statuti u roku od šest mjeseci.

AKIF FAZLIĆ – općinski načelnik

I ja se u potpunosti slažem sa Zaključkom da se donesu Statut u mjesnim zajednica, a ono što ne mogu kazati i to bi možda trebalo ostaviti Komisiji za statut i propise, pitanje saglasnosti na te Statute. Ljudi, ako gledamo, to je mjesna samouprava. Isto kao što niko ne može dati saglasnost vama na lokalnu samoupravu, na Statutu ovog Općinskog vijeća i ove Općine, tako ne bi trebalo moći dati saglasnost ili bilo kakvu intervenciju na Statute vezano za mjesnu samoupravu. Dakle, oni su definisani po Zakonu o lokalnoj samoupravi kao mjesna samouprava. I dakle, ako se tu pojavljuje neki tutor, onda to više nije samouprava. Znači da to ostavimo. Slažem se ako to pravno i proceduralno može proći da se da saglasnost na te Statute, ali da to ispitamo i da to ostane u nadležnosti Komisije za statut i propise, ali ključ je da mjesne zajednice donesu svoje Statute, neko je rekao u roku od dva mjeseca, a ja sam rekao šest mjeseci, pa možda treba naći neki odgovarajući rok. To je broj jedan. Broj dva, kada je u pitanju prvi Zaključak, vi stalno tražite nekog drugog da je odgovoran za ono što je bilo u mjesnoj zajednici i da neko drugi radi za tu mjesnu zajednicu. Nemojmo bježati od toga. Odgovoran je neko ko je bio u Savjetu mjesne zajednice i odgovoran je neko ko sada vodi mjesnu zajednicu. Sve drugo je nešto prenošenje, spašavanje. Bježimo od toga. Pozicija Savjeta mjesne zajednice je da odgovara za rad mjesne zajednice, isto kao što načelnik odgovara za rad Općinskog vijeća i donijet će vam taj godišnji Izvještaj koji ćete vi pretresati, usvojiti ili ne usvojiti. Isto tako Izvještaj o radu mjesnih zajednica treba oni da ponude svom zboru građana koji će ga razmatrati, na osnovu kojeg će cijeniti odgovornost rada tog Savjeta. Dakle, ja i dalje stojim na principu da sve što treba tim Savjetima pripremi im se i dostavi, ali oni moraju donijeti Odluku. Oni moraju na Savjetu donijeti Odluku da pokreću neku vrstu odgovornosti ili ne. Oni moraju donijeti Odluku i kazati: "Ovo je uredu, donijeli smo program mjera na prevazilaženju nečega". Za izradu toga, dobit će svu vrstu pomoći, ali ja ne podržavam ono da je, recimo sada, Komisija Općinskog vijeća ta koja će pokretati neku vrstu odgovornosti ili neka Služba, a možda bi bliže Komisija Vijeća imala neko pravo da pokreće neku vrstu odgovornosti ako želimo da gledamo Savjete, odnosno mjesnu samoupravu onako kako je sada postavljena Zakonom. Mjesne zajednice imaju svoj kapacitet, imaju svoje nadležnosti i u okviru tih nadležnosti da to vode.

Bliže sam ovom Zaključku koji je Kolegij predložio da Savjeti donose Odluku, a naravno da oni mogu konsultirati i Komisiju Vijeća i našu Službu u smislu pripreme te Odluke šta će

raditi, ali biti član Savjeta i predsjednik Savjeta, a da neko drugi za mene donosi Odluke kad god je neki problem i sl., mislim da to nije to.

Ja aludiram da je ovaj prvi Zaključak bliži i ako ga treba eventualno još doraditi, ali u suštini treba da odražava odgovornost Savjeta. Ako ga treba malo modificirati, ali izmještati odgovornost na nekog drugog ja nisam za to. To je moja diskusija, ali vi kao Općinsko vijeće možete donijeti neki usaglašen stav.

ALMIR ŠPIODIĆ – samostalni vijećnik

Uvlačimo se u priču da Vijeće podrži nove Savjete i ovo što je predsjedavajuća rekla to stoji i to je OK da oni mogu poduzeti određene radnje. Ja podržavam nove Savjete i spreman sam otići na sve zborove građana, sve njihove sastanke bilo gdje da me pozovu, ali ne mogu da dam neku suglasnost da oni tu kao nešto mogu sami pokrenuti. Osim toga, oni nemaju ni kapaciteta. Mi smo otišli daleko od teme koju je kolega Bumbulović pokrenuo. Problem su Mjesne zajednice Gajevi i Misoča. Ako Mjesna zajednica Gajevi želi neku tužbu da pokrenu, oni nemaju finansijska sredstva da to mogu. Zato postoji općina. Nije mi prvi Zaključak u potpunosti jasan i ne mogu se složiti s njim.

ANEL BUMBULOVIĆ – vijećnik SDA (krivi navod)

Kolega Špiodiću, ja nisam spomenuo niti Gajeve niti Misoču. Ja sam generalno diskutovao o kompletnom Izvještaju. Konkretno nisam niti jednu mjesnu zajednicu spomenuo.

ANEL BUMBULOVIĆ – samostalni vijećnik (replika)

Razumijemo se mi da vi niste direktno spomenuli šta je problem, ali zbog problema u te dvije mjesne zajednice je i zakazana i tematska sjednica i obraćanje, ali igramo se gluhih telefona. Zbog te dvije mjesne zajednice je ovaj Izvještaj i sva ova priča danas, ali svi "peru ruke" i neće niko to da kaže. Završena je tačka dnevnog reda i nemojte da govorimo o detaljima i imenima i prezimenima. Trebali ste to odmah reći.

ALMA OMEROVIĆ – predsjedavajuća

Kolega Špiodiću, sjednica nije zakazana samo zbog te dvije mjesne zajednice, jer mi bi trebali da vodimo računa o svim mjesnim zajednicama, zato smo i zatražili sav ovaj materijal.

Diskutanata po ovoj tački dnevnog reda više nije bilo, pa je predsjedavajuća dala na glasanje Zaključak broj 1.

Općinsko vijeće je većinom glasova donijelo

ZAKLJUČAK

Općinsko vijeće Ilijaš daje punu podršku novoizabranim Savjetima mjesnih zajednica sa područja općine Ilijaš, da u potpunosti utvrde činjenično stanje vezano za rad prethodnih Savjeta mjesnih zajednica, te na osnovu toga, ukoliko je potrebno, pokrenu i određene radnje za utvrđivanja odgovornosti istih.

Zatim je dala na glasanje Zaključak broj 2.

Općinsko vijeće je jednoglasno donijelo

ZAKLJUČAK

Općinsko vijeće Ilijaš zadužuje općinske Službe općine Ilijaš, da kontinuirano pružaju stručnu pomoć u radu Savjeta mjesnih zajednica po svim pitanjima vezanim za njihove nadležnosti.

Predsjedavajuća je dala na glasanje i Zaključak broj 3.

Općinsko vijeće je jednoglasno donijelo

ZAKLJUČAK

Općinsko vijeće Ilijaš zadužuje Savjete mjesnih zajednica sa područja općine Ilijaš da donesu Statute mjesnih zajednica do kraja tekuće godine.

Nakon što je iscrpljen dnevni red, predsjedavajuća Alma Omerović zaključila je tridesetčetvrtu sjednicu OV-a Ilijaš u 11:50 h.

Zapisničar:
Maida Habibović

PREDSJEDAVAJUĆA
OPĆINSKOG VIJEĆA ILIJAŠ

Alma Omerović, BA nov.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
certifikat:CRO20063Q

